

Deklarasaun Politika P-CNRT

DEBATE GENERALIDADE OGE 2017

23 Novembru 2016

Deputado Natalino dos Santos Nascimento - Prezidente Bankada CNRT Parlamento Nacional

SE. Presidente do Parlamento Nacional, Sr. Aderito Hugo da Costa SE. Primeiro Ministro da RDTL, Sr. DR.Rui Maria de Araujo Ex.mos Srs. Membros do governo Distintos/as Srs. Deputados do Parlamento Nacional Rona nain no povo doben Timor Leste

Permite mai hau lori bankada CNRT nia naran hato'o ami nia deklarasaun politika hodi fo bankada CNRT nia aprisiasaun ba proposta de lei do orsamento jeral do Estado tinan 2017 nian.

Maibe uluk nanain hakarak hato'o ami nia bem vindo ba SE. Primeiro Ministro do VI Governo konstitusional ho nia membro do Governo tomak ne'ebe ohin hakat mai iha uma fukun Parlamento Nacional hodi hato'o proposta de lei do Orsamentu Jeral do Estado (OJE) 2017 nudar orsamento ikus husi VI governo,governo CNRT nian.

Iha biban ida ne'e mos bankada CNRT hakarak atu kongratula VI Governu konstitusional ne'ebe simu kna'ar nudar kontinuasaun husi V Governu konstitusional hodi kumpri mandato konstitusional iha eleisaun jeral rua nia let.

Bankada CNRT apresia tebes ba susesus hotu ne'ebe VI governu consegue iha ambitu dezenvolviment nian maibe liu liu ba estabilidade politika no seguransa ne'ebe ita nia nasaun hetan durante periodo governasaun,inkluidu susesu ne'ebe hetan iha elisaun leaders komunitario (chefes do sucos no chefes de aldeias),embora hetan kritika lubuk ida husi public maibe elisaun lao ho diak.Ba ne'e bankada CNRT apresia ho governo sentral no local nia servisu,la haluha mos ami nia apresiasaun ba orgaun eletorais sira (CNE no ESTAE) ba dedikasaun no responsabilidade tomak hodi fo susesu ba elisaun,agradese mos ba komponente hotu estado nian ne'ebe direta ka indireta kontribui ona ba susesu ida ne'e.

CNRT Partido politik ne'ebe iha mehi bo'ot ba moris diak povo nian no iha ambisaun atu tau ses tia povo Timor Leste husi situasaun injustisa social no mos kualker forma desiguldade iha vida umana ninian. Nune'e iha periodu governasaun rua ne'ebe CNRT mak kaer,nia agenda politika ba governasaun nian maka:

Promove paz no rekonsiliaaun, hametin estabilidade politika no seguransa, dudu no halais dezenvolvimentu nasional

Hodi lori povo ba moris diak ne'ebe ita hotu mehi nudar premio ukun rasik'an nian. Nudar nasaun ne'ebe foin ukun'an no iha hela faze kondtrusaun de estado nian maka governo ida ne'ebe deit maka simu kbi'it husi povo atu kaer ukun,simu nudar todan ida tebes ne'ebe la fasil atu konkretiza mehi no ambisaun hirak ne'e iha deit periode governasaun ida ka rua nia laran.

Maske nune'e, governasaun sira CNRT nian, governo tenta ho esforsu oi oin hodi introduz politika de dezemvolvimentu nasional liu husi plano asaun anual ne'ebe refleta ba plano estratejiku dezemvolvimentu nasional nian ne'ebe define ona nudar linnas mestre ba dezemvolvimentu pais nian.

Bankada CNRT elozia tebes ba IV no V governo konstitusional ne'ebe lidera husi maun bo'ot **KAYRALA XANANA GUSMÃO** ho matenek no brani hodi dezena politika dezemvolvimentu nasional ho objetivu longo prazu nian atu transforma Timor Leste nudar Pais ne'ebe ho rendimento medio-alto to'o iha 2030.

Excelliansias, atu atinje objetivos definidas, maka governo tinan-tinan apresenta orsamento ne'ebe konsekuentemente aposta ba iha:

1. Investimento ba mega projetos hanesan prjeto tasi mane (*Suai Suplay base*, Refinaria Betano no LNG – Beço, Viqueque), ZEEMS Oe-Cusse no porto Tibar nudar alternativas atu asegura sustentabilidade ekonomia no oinsa atu estado bele Korean husi dependencia despesas estado nian iha orsamento jeral do estado tinan tinan ba fundo minarai.
2. Fundu infraestruturas hodi halo no hadia estradas no pontes sira, be'e mos no sanitasaun, hadia no hari eskolas sira, hadia no hari ospitais sira hari sentral eletrica no seluk tan ho objetivu atu oferese asesu publiku no mos kria kondisaun minimu hodi atrai investimento ekonomiku.
3. Politika inkluzoan social atu hadia no integra grupos vulneraveis ba iha vida social ida ne'ebe digno tuir vista Timor Leste nia no mos halo politika valorizasaun ba Veteranos no antigo kombatentes sira ne'ebe presta sira nia vida hodi luta ba ukun rasik'an durante tempo naruk nia laran. Ne'e hotu ho objetivu atu reduz tia disequilibrio social iha sociedade timorensa.
4. Fundu dezemvolvimentu capital humano nudar politika ba formasau no kapasitasaun hodi bele produz rekursus ne'ebe kualifikadu atu bele asegura sustentabilidade governasaun nian hodi Korean husi dependencia ba assessores.

Alem de ne'e, agenda importante rua ne'ebe governo introduz mos iha orsamento jeral do estado tinan tinan maka;

- Politika ba Desentralizasaun poder ho objetivu atu lori ka habesik governasau ba povo nudar mandato konstitusional ne'ebe hahu introduz;
- Iha V governo, lidera husi maun bo'ot **KAYRALA XANANA GUSMAO** hodi hahu halo estudu no analiza ba relevansia konseito no realidade hodi buka forma oinsa implementa politika desentralizasaun.

Nune'e hahu ho konseito pre-deskonsentrasaun no ikus mai implementa konseito deskonsentrasaun ne'ebe tinan ida ne'e (2016) VI governo, lidera husi Sua Excia Dr Rui Maria de Araujo halao ona delegasaun de kompetensia de servisu husi governo sentral ba Munisipius sira ho grau de kompetensia hanesan autoridade municipal ba Munisipio 4 (Baucau, Bobonaro, Dili no Ermera) Administrasaun municipal ba Munisipio sira seluk la inklui Oe-Cusse. Ne'ebe agora dadauk Oe-Cusse goza ona nia status espesial tuir Lei No. 3/14.

Ne'e nudar fase dahuluk hodi lao ba poder local lolos nian tuir define iha lei poder local nian, ne'ebe agora dadauk iha ona agenda Komisaun A Parlamento Nasional.

- Reformas iha seitor publiku ho objetivo atu bele ajusta qualidade atendimento. Nune'e reformas ne'ebe lao hela dadauk foka ba iha reforma lejislativas, administrasaun

publikas,ekonomia no reforma fiscal.Ba ne'e bankada CNRT nia parabens ba VI governo ba esforsu sira ne'e no hein katak sei konklui iha mandato nia laran.

Bankada CNRT konsiente katak buat hotu ne'ebe governasaun sira CNRT nian halo ne'e seidauk masimu tuir ema hotu nia espetativa maibe hein katak ita hotu bele rejista progresus no avansus sira ne'ebe ita nia nasaun hetan durante governasaun sira ne'ebe CNRT kaer. Konsiente mos katak susesu lubuk ne'ebe iha ne'e CNRT sei la konsegu karik laiha kontribuisaun vontade politik husi forsa politik hotu ne'ebe existe iha PN iha II no III lejislatura,ba ne'e ami nia apresiasaun ne'ebe klean tebes.

Excelencias, Ohin governo dala ida tan mai iha uma fukun Parlamento Nasional hodi hato'o proposta de lei ba orsamento jeral do estado ba tinan 2017 nudar orsamento ikus ba governo ida ne'e.

Bankada CNRT nudar forsa governo nian,fo ami nia apresiasaun ba politika sira ne'ebe refleta iha orsamento jeral do estado tinan ida ne'e ne'ebe kontinua aposta ba iha seitor sira ne'ebe define nudar prioridade ba dezemvolvimento nasional basea ba politika dezemvolvimentu mileniu hodi kontinua atrai investimento privadu liu hosi implementasaun projetos hanesan estradas no pontes,porto no aeroporto no eletricidade nune'e bele fo biban no vontade ba seitor privadu atu investe.

Orsamento ho total 1.386,8 milões de dólares ne'ebe governo propoin iha OJE 2017 ida ne'e alem de atu sustenta funsionamento makina do estado maibe mos aposta ba iha seitores dezemvolvimentu ne'ebe governo define iha plano asaun annual tinan ide ne'e nian.

Nune'e mos tamba governo implementa dadauk ona politika ba desentralizasau ne'ebe hahu ho delegasaun de kompetensia servisu ba munisipio sira maka governo mos iha obrigasaun atu aposta ba iha munisipio sira atu dudu no enkoraja munisipio sira hodi halao preparaun ne'ebe diak atu lao ba poder local ninian.

Embora governo iha komitemento atu hodi kontinua implementa projetos fisikus sira ho objetivus atu atrai investimento seitor privado maibe iha OGE 2017 governo la tau osan bo'ot ba iha fundu infraestrutura.

Ne'e tuir bankada CNRT nia hare pertinente duni tamba 2017 koinside ho agenda nasional ba elisaun jeral ne'ebe tenke halao periodikamente kada tinan lima. Tan ne'e bankada CNRT fiar katak ita hotu nudar politiku sei okupadu mos ho atividade politik ne'ebe partidu politik sira organiza atu hasoru elisaun.

Ne'e duni tempo normal ba ita hotu atu exekuta no mos atu fiskaliza projetos sira sei limitadu tebes ne'ebe implika ba qualidade exekusaun no mos qualidade husi resultadu.Tamba ne'e bankada CNRT apresia wain hira governo la tau osan bo'ot ba iha fundu infraestrutura iha orsamento jeral do estado ba tinan 2017.

Excelencias, Ba 2017 Governo aloka orsamento ba kategoria transferensia public ho valor \$ **421,270** milões de dólares,montante ne'ebe bo'ot liu kompara ho kategoria da despesas sira seluk.Ne'e duni husu ba governo atu bele exekuta ho responsabilidade hodi bele aseguara boa exekusaun ba orsamento jeral do estado nian tamba ita iha dadauk ona mandato nia rohan no mos ita hotu sei atrabesa situaun politik ba elisaun jeral 2017 nian.

Atu remata bankada CNRT hato'o ami nia apresiasaun ba vontade politik hotu ne'ebe oferese husi bankada sira ne'ebe eziste iha Parlamento Nasional iha II no III lejislatura (FRETILIN, PD, FM) nune'e bele aseguara governasaun ne'ebe kaer husi P-CNRT hodi halao politika

dezemvolvimentu nasional ho diak no ohin loron ita bele rejista progresus lubuk ida ba ita nia nasaun iha ambitu dezemvolvimentu.

Bankada CNRT hein katak iha debate ba orsamento jeral do estado 2017 nian ita hotu sei tane as interese nasional hodi kontribui ba debate ida ho kualidade no ikus mai bele hetan aprovasaun ne'ebe kualifikadu.

Rekomenda ba Governu atu estabeselese imediatamente kuadru legais ba Autoridade ZEEMS, tanba Governu investe ona osan ho monatanante bo'ot. Nune'e mos husu ba Governu atu implementa ho lalais Projeitu Tasi Mane iha Kosta Sul, tuir hanesan Governu nia planu.

Husu mos ba Parlamento Nasional atu aslera lalais prosesu ba Lei Pensaun Vitalisia, Lei Rai no Ordenamentu Teritorial, Lei Anti Korupsaun, Lei Poder Lokal no mos Lei Mineral. Lejislasaun hirak ne'e importante tebes ba aslera prosesu dezemvolvimentu Timor-Leste iha area sira estratejiku sira ba futuru.

Atu bele iha sistema *check and balances* ida diak entre orgaun soberanu sira, Bankada CNRT mos hakarak rekomenda mos ba Governu no Parlamento Nasional atu halo mos auditoriu ba Tribunal, tanba nu'udar orgaun soberanu Tribunal das Contas rasik mak halo ona auditoria ba instituisaun governu sira inklui Parlamento Nasional.

Ezizensia ida ne'e razoavel tanba nu'udar orgaun judisial, wainhira tribunal halo auditoria ba sukat transparensia no akuntabilidade ezekeusaun orsamentu estado husi orgaun soberanu sira seluk, mak ezizensia auditoria hanesan tenki halo ba Tribunal rekursu rasik nu'udar orgaun soberanu ne'ebe utiliza mos orsamentu estado. Atu nune'e konseitu *check and balance* ne'e laos slogan ka mehi deit, maibe implementa ho real no substantivu duni.

Excelensia Sr. Primeiru Ministru no Povu Doben Timor-Leste, Iha okaziaun ida ne'e Bankada CNRT mos hakarak afirma dala ida tan kona-ba prosesu bot rua ne'ebe liga ba malu ho metin tebes. Ida mak oinsa prosesu tranzisaun lideransa husi jersaun tuan ba jersaun foun ne'ebe hatudu progresu diak tebes. Tranzisaun refere hahu kedas husi Prezidencia da República, Parlamento Nasional no mos iha kargu masimu ezekeutivu nian hanesan Primeiru Ministru, ne'ebe oras ne'e lidera husi figura lideransa foin sae sira.

Wainhira Maun Boot Kay Rala Xanana Gusmão hamosu ideia brilante hodi resigna an husi kargu Primeiru Ministru iha momentu ne'eba, publiku inklui ita tomak sinte atrapailha ho desizaun refere. Partidu CNRT rasik liu husi nia Konferensia Estraordinariu ida, hodi ikus mai rekomenda ba Maun Boot Kay Rala Xanana Gusmão atu labele resigna an. Maibe Maun Boot kontinua disidi hodi tun husi nia kargu no ho konviksaun as tebes intrega hikas ba figura jersaun foun ida hanesan Dr. Rui Maria de Araujo, atual Primeiru Ministru hodi kontinua lidera Governu CNRT ne'ebe Maun Boot depozita ba.

Desizaun estraordinariu Maun Boot rezulta mos progresu estraordinariu oin rua ne'ebe importante tebes ba Timor-Leste, hanesan tuir mai: **primeiru**, estabilidade governativu lao ho diak nafatin tanba orgaun soberanu estado sira solidu nafatin. Etabilidade siguransa rai laran diak liu tan, inkluziun politiku entre kamada politiku sira mos forte liu tan, atividade ekonomia, edukasaun, no moris povu lao ho normal no trankuilu tuir realidade Timor-Leste nian.

Sigundu, desizaun estraordinariu iha leten afinal sai hanesan *starting point* ida ba Maun Bot hodi hahu prepara estratejia, no estuda materia relevantes sira hotu relasiona ho disputa fronteira maritima entre Timor-Leste ho Australia. No ikus mai Konseilu Ministru

disidi hodi fo konfiansa masimu povu Timor-Leste nian ba Maun Boot Kay Rala Xanana Gusmão hodi ba lidera prosesu negosiasaun ba delimitasaun permanente fronteira maritima entre Timor-Leste, ne'ebe to'o agora hatudu progresu espektaklu tebes.

Embora seidauk manan, maibe Timor-Leste kuinese diak tebes kontestu global, oinsa utiliza oportunidade sira iha hodi luta ba defende nia dignidade soberanu nasional ho dalan ida dignu. Liu husi hili opsaun Konsiliaun Obrigatoriu iha ONU, Timor-Leste konsege obriga Australia hodi hakat ba meja negosiasaun iha Tribunal Internasional iha Den Haag, Holanda, hodi koaliala ka negosia ho transparente no akuntavel.

Progresu refere espektaklu tebes tanba Timor-Leste konsege sobu duni tradisaun internasional katak, seidauk iha país ida iha mundu mak koko dalan konsiliaun obligatoriu hanesan opsaun ida ba resolve sira nia disputa fronteira maritima ho país seluk. Opsaun ida ne'e sai hanesan realizasaun ida nasaun seluk bele banati tuir. Hanesan aik knanoik murak iha dalen Melayu dehan katak:

Sekali mendayung, dua-tiga pulau tercapai

Sintidu husi aik knanoik ne'e refleta tebes iha Maun Boot Kay Rala Xanana Gusmão nia desizaun wainhira disidi tun husi nia kargu Primeiru Ministru sem presaan husi ema ka parte ida. Desizaun visionariu ne'e nia impaktu ka vantajen mak ita foin asisti hamutuk iha agora dadauk.

Iha parte ida, tranzisaun lideransa nasional iha Timor-Leste, lao ho normal no trankuilu, no sai lisaun bot ba mundu. Iha sikun seluk negosiasaun fronteira maritima Timor-Leste ho Australia nian mos "nakduir" ba oin ho progresu ida diak tebes-tebes, no loke mundu internasional nia matan dala ida tan kona-ba istoria país ki'ik oan ida hanesan Timor-Leste, nia luta ba defende nia dignidade soberanu total, iha rai maran no mos iha tasi, liu husi dalan ida legal tuir padraun internasional nian ho dignu.

Ikus mai, atu taka deklarasaun ida ne'e, Bankada CNRT hakarak bolu atensaun ba Timoroan tomak:

***Mai ita firme nafatin iha hanoin no pasu ida deit ba ita nia
luta foun ida ne'e. Labele husik let k'ik oan ida ba parte
seluk hodi aproveita baralha no estraga ita nia objetivu
nasional ne'ebe ita luta dadauk ne'e.***

Tanba ikus mai rezultadu husi luta sira ne'e hotu mak ita sei realiza ita nia *ideais grandiosos* sira, liu husi kontinua implementa programa dezeonvolvimentu iha setor hotu-hotu ba povu nia moris diak iha futuro.

**O B R I G A D U Fiar An Lao Ba Oin - FALBO MEHI HAMUTUK MEHI
POVO NIA MEHI**